

# Enyaarubha yo okutaanga ya Pauro ku Timoteo Obhutaangiro

Enyaarubha yino yakaamirwe na Pauro. Akamukaamira omuutu wuno yaari akubhirikirwa Timoteo, wuno akatuuribhwa kwe enzira ye emirimo gya Pauro, nikyo kikoriri Pauro aramubhirikira Timoteo kubha, omwaana waaye we eheene mubhwiikirirya. Timoteo ahaageendania na Pauro mumirimo myaaru gyo okurwaaza Amang'ana Amazomu iguru wa Yeesu Krisito (rora Amahokya ga Abheega 17:14-15, 18:5). Pauro hano yaari akyaari kukaama enyaarubha yino, akamuha Timoteo emirimo gyo okwiimeererera abhiikirirya mumugye gwa Efeso.

Obhugirirye bhwa Pauro okukaama enyaarubha yino, bhwaari ni kumubhuurira Timoteo kyeego ekweenderwa okusora no okweegya abhakaruka bhe ekanisa na abhasakirya. Pauro akeenda kubha, abhakaruka bhabhe abhaheene, bheegye obhuheene ne eteemo nzomu kubhiikirirya. Kweeki aramusabha ewe hamwe na abhiikirirya bhoosi bhabhe, bharasabhira abhaatu bhoosi, kumasabhi ga maanga goosi. Ekitabhu kino kireegya abhiimeerereri bha amakanisa bhabhe na amanaga okwaanga ameegyo goosi go orurimi. Kweeki kina amaragiriryo maaru gano

gakunagya kusakirya abhiimeerereri bha makanisa eziisiku zino okukaangata amakanisa gaabhu.

### *Obhukeerya*

<sup>1</sup> Enyaarubha yino nikaamiri enye Pauro, omweega wa Krisito Yeesu. Nitumirwe kubha omweega wa Krisito Yeesu kwo obhuswaagyo bhwa Taatabhugya Omutuurya weetu, na Krisito Yeesu niwe erisigo ryeetu.

<sup>2</sup> Nirakukaamira awe Timoteo, omwaana waane we eheene mubhwiikirirya.

Orubhaango, ebhigoongi no omureembe okurwa ku Taatabhugya Taata, na ku Krisito Yeesu Omukuru weetu, bhibhe naawe.

### *Obhurekya iguru wa ameegyo go orurimi*

<sup>3</sup> Hano natanwiiri kugya mumugye gwa Makedonia, nikakusabha wiikare mumugye gwa Efeso, nikakukumiirirya okubha obharekye abhaatu bhano bhakweegya ameegyo go orurimi.

<sup>4</sup> Obharekye bhatige okugwaatirira amagano gano gatana bhweera, no okwiinyaakya no obhuzaabhi bhwa amariina ga bhazaazi gano gatana obhuteero. Amang'ana gayo goosi garakora obhuhakani, gatakusakirya abhaatu okumwiikirirya Taatabhugya, kyeego gari amiiseego gaaye go obhutuurya bhuno bhukutuukana no obhwiikirirya.

<sup>5</sup> Obhugirirye bhwe eriiragiriro riyo ni kubha, abhiikirirya bhaseegane kwo obhuseegi bhwe

eheene, kumitima mizomu no obhwiiikirirya bhwe eheene.

<sup>6</sup> Nawe abheegya abhaandi bhatigiri gayo, bhiikyooriri, bharagaamba amang'ana gano gatana bhweera.

<sup>7</sup> Bhareenda bhabhe abheegya bhe emigiro\* gya Musa, yiingabha gano bhakubhuga no okukumiirirya, bhatagamenyiri.

<sup>8</sup> Nawe etwe tumenyiri kubha, emigiro gya Musa ni mizomu, kyeego omuutu araagituniirire kyeego ekweenderwa.

<sup>9</sup> Kweeki, tureenderwa kumenya kubha, emigiro gitatuurirwe kubhe eheene, nawe kubhano bhakusarya emigiro na bhano bhakwaanga, kubhano bhatakumuseengera Taatabhugya na abhasarya. Na gyatuurirwe kubhano bhatakumwiigwa Taatabhugya na abhabhi, kubhano bhakwiita bhawiise na bhanina waabhu, na kubhiiti bha abhaatu,

<sup>10</sup> kubhaseebheeti na bhano bhakuhiindira na abhasubhe abharikyaabhu kya abhakari, kubhano bhakuratira abhaatu no okubhagurya mubhutumwa, abhabheehi, na kubhano bhakwiirahira kwo orurimi. Emigiro gituurirwe kumang'ana goosi gano gatakweendana na ameeogyo go obhuhoru.

<sup>11</sup> Ameegyo gayo, garabhoneka mu Mang'ana Amazomu, gano gakweerekya obhuguungo bhwa Taatabhugya murubhaango rwoosi. Amang'ana gayo nigo nikahaabhwa na Taatabhugya nibharwaazire.

---

\* **1:7 Abheegya bhe emigiro.** Rora amang'ana gano mu Bhugaruri bhwa Amang'ana Amakong'u.

### *Omureembe gwa Yeesu Krisito ku Pauro*

<sup>12</sup> Nirabhuga, “Ozomirye, Krisito Yeesu Omukuru weetu.” Ewe akaaniha amanaga, kwo okubha akaanimenya ni muheene no okunisora nibhe omuhokya waaye.

<sup>13</sup> Na yiingabha kubhutaangiro hayo, nikamutuka no okunyaakya abhaatu bhaaye, niari omuzabhuri, nawe ewe akaanirorera ebhigoongi. Akakora ego, kwe ekigirirye niari nirakora gayo kwo obhugeege na nitaari no obhwiikirirya.

<sup>14</sup> Eheene Omukuru weetu Krisito Yeesu akaanitweera ebhite bhukong’u, kweeki akaaniha obhwiikirirya no obhuseegi kwo okugwaatana neewe.

<sup>15</sup> Eng’ana yino ni ye eheene, na ereenderwa okwiikiribhwa kubha, “Krisito Yeesu akaaza mukyaaro, okubha atuurye bhe ebhibhi.” Na gati we ebhibhi bhayo, enye neenye nikoriri ebhibhi kukira bhoosi.

<sup>16</sup> Nawe kwe ekigirirye kiyo, Yeesu Krisito akaanirorera ebhigoongi! Akaanierekya okwiikong’eererya kwaaye kweenye we ebhibhi kukira bhoosi, okubha nibhe ekireengyo kubharya bharaamwiikirirye no okusuung’aana obhuhoru bhwa kirakeego.

<sup>17</sup> Ambe, Taatabhugya niwe omutemi wuno atana obhuteero, atakukwa, naabhe atakurorekana, na niwe omweene. Ewe asuung’aane obhusuuku no obhuguungo kirakeego na kirakeego. Gabhe ego.

*Pauro aramuswaagya Timoteo okugwaatirira amaragiriro*

<sup>18</sup> Timoteo omwaana waane, nirakuha amaragiriro gano, kuriing’ana na amang’ana go obhurooti gano gaagaambirwe iguru waazo. Amang’ana gayo gakusakirye kye ekigwaato mwiihi rya Taatabhugya izomu.

<sup>19</sup> Ogwaatirire obhwiikirirya no omutima muzomu. Abhaatu abhaandi bharegiri okukora garya bhamenyiri kubha ni heene, riyo rikoriri bhatige obhwiikirirya bhwaabhu.

<sup>20</sup> Mubhaatu bhayo arimu Himenayo,<sup>†</sup> na Arekizanda. Bhayo nibhatigiiri Seetaani<sup>‡</sup> okubha bheege, bhatige kumutuka Taatabhugya.

## 2

### *Ameegyo iguru yo obhusabhi mumakanisa*

<sup>1</sup> Ambe, obhweemero bhwa goosi, nirakusabha awe hamwe na abhiikirirya bhoosi mubhe murasabhira abhaatu bhoosi, kumasabhi ga maanga goosi. Kweeki, mubhe muramubhuurira Taatabhugya “Ozomirye” kwiiguru ya abhaatu bhoosi.

<sup>2</sup> Mureenderwa kubhasabhira abhatemi na abhaandi bhoosi bho obhukaangati, okubha twiikare kwo omureembe, tumutuniirire Taatabhugya no okubha ne eteemwa nzomu.

<sup>3</sup> Eriing’ana rino ni zomu, kweeki riramuzomera Taatabhugya Omutuurya weetu.

<sup>4</sup> Ewe arenda abhaatu bhoosi bhatuuribhwe, no okumenya obhuheene.

---

<sup>†</sup> **1:20** Rora 2 Timoteo 2:17-18.    <sup>‡</sup> **1:20** Obhugazuro bhwa **nibhatigiiri Seetaani** ni kubha Pauro akabhaanga okugeenderera kugwaatana hamwe na abhiikirirya mukanisa.

<sup>5</sup> Tumenyiri kubha gayo ni go obhuheene, kwo okubha ariho Taatabhugya wumwe ego, no omuutu wumwe wuno okwiigwaania abhaatu na Taatabhugya, neewe ni Krisito Yeesu.

<sup>6</sup> Ewe akaruusya obhwiikari bhwaaye omweene, okubha abhatuurye abhaatu bhoosi. Bhuno nibhwo obhweerekenio bhuno Taatabhugya akatuha, kwiibhaga rino yateeriho.

<sup>7</sup> Na kwe ekigirirye kiyo, enye nikatuurwa kubha omweega nigeende okurwaaza no okweegya bharya bhatari Abhayahudi amang'ana go obhwiikirirya no obhuheene. Niragaamba ge eheene, nitakugaamba orurimi.

<sup>8</sup> Kweego, ahagiho hoosi hano mukwiikumania kusabha, ndeenda abhasubhe bhagororokye amabhoko iguru okusabha. Bhakore ego kwa amiiseego mazomu, bhasabhe bhatana obhuhaari naabhe kuhakana.

<sup>9</sup> Kweego ndeenda abhakari bhiibhoohe kyeego ekweenderwa, bhabhe ne eteemo nzomu na kusuuhu. Bhataseega kung'arira kwo okusuka eziinzweeri,\* kasi kwo okwiibhoha ebhigiro bhye ezahaabu na bhino bhikubharyabharya, kasi eziingibho zyo obhuguri bhukuru.

<sup>10</sup> Nawe bhabhe ne eteemo nzomu, kyeego bhakweenderwa abhakari bhano bhiikiriirye kumuseengera Taatabhugya.

<sup>11</sup> Hano abhakari bhakubha bhareega, bhabhe abhiitegeereri na abhiigwa.

<sup>12</sup> Nitakubhaha abhakari omweeya gwo okweegya naabhe okukaangata abhasubhe,

---

\* **2:9 Okusuka eziinzweeri**, ku Kizanaki bhaari bharabhuga, okuruka kaswa.

nawe bhabhe abhiitegeereri.

<sup>13</sup> Niragaambeego, kwo okubha Taatabhugya akabhuumba Adaamu kubhweemero, okumara Haawa.

<sup>14</sup> Naabhe Adaamu ataang'eenererwe, nawe omukari niwe akang'eenererwa, akasarya obhuswaagyo bhwa Taatabhugya.†

<sup>15</sup> Nawe abhakari bharasuung'aana obhutuurya kwe enzira yo okwiibhura abhaana, kyeego bhakugeenderera kwiikara mubhwiikirirya, obhuseegi, obhuhoreeru no okubha na kusuuhu.

### 3

#### *Omukumo gwa abhiimeerereri bhe ekanisa*

<sup>1</sup> Eriing'ana rino ni rye eheene, “Omuutu wuno areenda emirimo gyo okubha omwiimeerereri we ekanisa, wuyo yiigoombiri emirimo emizomu.”

<sup>2</sup> Ambe, omwiimeerereri we ekanisa, abhe omuutu wuno atakusororibhwa. Abhe no omukari wumwe ego, abhe na kusuuhu, kweeki abhe wa amang'eeni, omuutu wuno akusuukwa, musaambaaruku, no omuutu wuno amenyiri okweegya.

<sup>3</sup> Atabha omunywi omuraara, atabha omurwaani, abhe munyoohu wuno aseegiri omureembe. Kweeki atabha wuno aseegiri eziimbirya.

<sup>4</sup> Abhe omwiimeerereri omuzomu we enyuumba yaaye, bhano bhamenyiri okweegya abhaana eteemwa yo okwiigwa no obhusuuku.

---

† **2:14** Rora Obhweemero 3:1-6.

<sup>5</sup> Eraabhe omuutu aratamwa okwiimeererera enyuumba yaaye omweene, aranagyabhwi okuriibha abhiikirirya mukanisa ya Taatabhugya?

<sup>6</sup> Kweeki, atabha omwiikirirya omuhya, ataaza okwiizuungya. Okwiizuungya kuyo kuramukora atinirwe ekiina kyeego Seetaani\* akatinirwa ekiina.

<sup>7</sup> Nawe, abhe omuutu wuno akugaambwa bhuzomu naabhe na abhaatu bhano bhatari Abhakrisito, okubha ataaza kubha na amasoro no okutiimbwa mukitiimbo kya Seetaani.

### *Omukumo gwa abhasakirya bhe ekanisa*

<sup>8</sup> Abhasakirya bhe ekanisa nabho, bhabhe ne eteemwa nzomu, bhatabha abhabheehi, bhatabha abhanywi abharaara, bhatabha bhano bhaseegiri eziimbirya.

<sup>9</sup> Nawe, bhabhe abhaatu bhano bhakugwaatirira obhuheene bhwo obhwiikirirya bhweetu kwo omutima muzomu.

<sup>10</sup> Bhayo nabho, bhasakibhwe obhutaangiro. Na bharirorekana kubha bhatana amasoro, niho bhakore emirimo giyo.

<sup>11</sup> Kweego, abhakari bhaabhu† bhabhe bhe eteemo nzomu, bhatabha abhamoonyi, bhabhe na kusuuhu, bhabhe abhaheene mumang'ana goosi.

<sup>12</sup> Abhasakirya bhabhe no omukari wumwe wumwe, na bhabhe bhariimeererera bhuzomu

---

\* **3:6 Seetaani.** Rora eng'ana yino mu Bhugaruri bhwa Amang'ana Amakong'u. † **3:11 Abhakari bhaabhu,** obhugazuro obhuundi bhuratura kubha, *abhakari abhasakirya.*

abhaana bhaabhu na abhaandi bhano bhari munyuumba yaabhu.

<sup>13</sup> Bharya bhano bhakukora emirimo gyo obhusakirya bhuzomu, bharabha bharasuukwa. Hayo bharaabhe no obhukaari bhwaaru bhwo kuraarika amang'ana go obhwiikirirya bhwaabhu mu Krisito Yeesu.

### *Obhuheene bhwo obhwiikirirya bhweetu*

<sup>14</sup> Nirakukaamira amang'ana gayo, yiingabha niriisiga okuuzo owaazo bhwaangu hano.

<sup>15</sup> Nawe nirikeezera, omenye gano bhakweenderwa abhaatu okukora munyuumba ya Taatabhugya. Abhaatu bhayo nibho ekanisa ya Taatabhugya wuno ari muhuru, ne ekanisa niyo etimu no obhurusu bhwo obhuheene.

<sup>16</sup> Obhuheene bhuno Taatabhugya yeerekirye ni bhwo okuruguurya, neebhwo ni bhuno, Krisito akiiyeerekya kwo omubhiri gwaaye, akeerekibhwa ne Egoro kubha omuheene, akarorekana kubhamaraika,‡ akarwaaza mubhyaaro bhyoosi, akiikiriribhwa na abhaatu mukyaaro kyoosi, akagegwa okugya iguru mubhuguungo.

## 4

### *Abheegya bho orurimi*

<sup>1</sup> Bhoono, Egoro Muhoreeru aragaamba atakubhisa kubha, muziisiku zyo obhuteero, abhaandi bharaaza okutiga obhwiikirirya bhwe

---

‡ **3:16 Bhamaraika.** Rora eng'ana *maraiika* mu Bhugaruri bhwa Amang'ana Amakong'u.

eheene, no okutuniirira eziikoro zyo obhung'eenererya, na ameegyo ga amasaambwa.

<sup>2</sup> Ameegyo gayo, gareegibhwa na bho orurimi, kweeki bho orurimi bhano emitima gyaabhu gikuuri kyeego gyookiibhwe kwe ekyooma kyo omuriro.

<sup>3</sup> Bhayo bharabharekya abhaandi kubha bhatige okukweera, kasi kurya ebhyaakurya ebhiindi. Nawe Taatabhugya akabhibhuumba okubha bhisuung'aanwe kwo okuzyomya na abhiikirirya, kwo okubha bhamenyiri obhuheene.

<sup>4</sup> Ebhigiro bhyoosi bhya Taatabhugya ni bhizomu, naabhe kitariho kyo okwaangwa. Bhyoosi bhisuung'aanwe kwo okuzyomya,

<sup>5</sup> kwo okubha eriing'ana rya Taatabhugya na amasabhi geetu, garabhikora ebhigiro bhiyo bhyeeribhwe.

### *Omubhagati omuzomu wa Yeesu Krisito*

<sup>6</sup> Oraabhahe abhahiiri bheetu ameegyo gano, hayo niho oraabhe omuhokya omuzomu wa Krisito Yeesu. Kweeki orabha okiiniiri bhuzomu mubhuheene bhwo obhwiikirirya bhweetu na mumeegyo amazomu gano ogatuniiriiri.

<sup>7</sup> Otigane na amagano ga abhaatu bhe ekare gano gatari ge enyaangi gano gatana bhweera, nawe wiinanye okwiikara kyeego Taatabhugya akweenda.

<sup>8</sup> Emenyekeeni kubha, "Okunarya omubhiri okubhona amanaga, kuno obhweera hasuuu. Nawe, wiinanye okwiikara kyeego Taatabhugya akweenda, bhuriho obhweera bhwa maanga goosi, kwo okubha bhuratuha obhurage bhwo

okubhona obhuhoru bhwa bhoono na bhuno bhukuuzwa.”

<sup>9</sup> Eng’ana yiyo ni ye eheene, abhaatu bhareenderwa bhasuung’aane.

<sup>10</sup> Riyo niryo riragirya turakora omukya, kwo okubha turamwiisigira Taatabhugya wuno ari muhuru, Omutuurya wa abhaatu bhoosi, kiindi bhano bhakwiikirirya.

<sup>11</sup> Amang’ana gayo, ogeegye no okugaswaagya.

<sup>12</sup> Omuutu wowoosi atakuzeera awe kwo okubha okyaari mumura, nawe okore omukya obhe ekireengyo kya abhiikirirya mubhugaambi, muteemo, na mubhuseegi, mubhwiikirirya na kwe eheene.

<sup>13</sup> Okore omukya kusomera abhaatu Amakaamo Amahoreeru, orwaaze no okweegya, tee hano niraaze eyo.

<sup>14</sup> Otatiga kuhokeerya obhuturo bhuno Taatabhugya akuheeri kuhitira amang’ana go obhurooti, eribhaga okaturirwa amabhoko na abhakaruka bhe ekanisa.

<sup>15</sup> Ogwaatirire amang’ana gayo, okubha abhaatu bhoosi bharore omukya gwaazo mubhwiikari bhwaazo.

<sup>16</sup> Wiiriibhe eteemo yaazo na ameegyo gaazo, no ogeenderere okukora ego. Hano okukora gayo oriituurya awe omweene na bhano bhakukwiitegerera.

## 5

### *Obhuswaagyo kubhiikirirya*

<sup>1</sup> Otabhiiyogya abhakaruka, nawe obhatoongere kyeego okutoongera wuuso

weenyu. Abhamura obhatoongere kyeego abhahiiri bhaazo,

<sup>2</sup> abhakiikuru kyeego nyoko weenyu, na abhaakya obhakorere kwe ekoro nzomu kyeego abhasubhaati bheenyu.

<sup>3</sup> Obhasuuke abhatuumba bhano bhatana wo okubhasakirya.

<sup>4</sup> Nawe, eraabhe omutuumba wowoosi ana abhaana kasi abhazukuru, bhayo bheege okusakirya abhahiiri bhaabhu. Hano bhakukora ego, niho bharariha abhiibhuri bhaabhu amazomu gano bhabhakoreeri. Ego niigo Taatabhugya akweenda.

<sup>5</sup> Omutuumba wuno atana muutu wo okumusakirya, wuyo aramwiisiga Taatabhugya, aramuseengera no okumusabha Taatabhugya amusakirye obhutiku no omwiisi.

<sup>6</sup> Nawe omutuumba wuno akuseega enaamba ye ekyaaro, wuyo akuuri yiingabha ararorekana muhoru.

<sup>7</sup> Amang'ana gayo, obhabhuurire abhiikirirya, okubha bhataaza kubha na amasoro.

<sup>8</sup> Nawe omuutu wowoosi wuno atakusakirya abhaatu bhaaye, kiindi bha munyuumba yaaye, wuyo arabha atigiri obhwiikirirya, kweeki abheeri mubhiihu kukira omuutu wuno atari mwiikirirya.

<sup>9</sup> Omutuumba ariikiriribhwa okubharwa mubhatuumba, eraabhe ahikirye emyaaka kweemera miroongo esaasabha (60), kweeki yaari mukari wo omusubhe wumwe.

<sup>10</sup> Abhe ano omukumo muzomu kumahokya gaaye. Abhe areriri abhaana bhaaye bhuzomu, abhe araginihya abhagini, abhe arabhiisaabhya

abhahoreeru amaguru gaabhu, abhe arabhasakirya bhano bhakunyaakibhwa, kweeki abhe ariiruusya na yibhanwiiri okukora amahokya amazomu.

<sup>11</sup> Nawe, abhakari abhatuumba, otabhaha omweeya kusikira mubhubharwa, kwo okubha enaamba yo omubhiri erabhatama kukira okwiiruusya ku Krisito, hayo bhareenda okukweerwa.

<sup>12</sup> Kwo okukora ego, bharabha bhatiniirwe ekiina, kwo okubha bhatigiri obhurage bhwaabhu ku Krisito bhwo okusaaga bhakyaari kukweerwa.

<sup>13</sup> Abhatuumba kya bhayo, bhanariri eteemo yo obhutobhu, bharageendageenda muziinyuumba zya abhaatu. Kweeki, bharabha abhagwaatania no okwiisikirya mumang'ana ga abhaandi, eno bharabhuga amang'ana gano gatakweenderwa.

<sup>14</sup> Bhoono, enye ndeenda abhatuumba abhasubhaati, bhabhe bharakweerwa, bhiibhure abhaana no okutuga eziinyuumba zyaabhu, okubha abhabhisa bheetu bhatige okutugaamba bhubhi.

<sup>15</sup> Rora kubha abhatuumba abhasubhaati abhaandi bhamariri okubhura no okumutuniirira Seetaani.

<sup>16</sup> Kyo omukari omwiikirirya ana abhatuumba mubhahiiri bhaaye, abhasakirye. Akore ego, okubha ekanisa etigwe kutamirwa, niho ekanisa erabha no omweeya gwo okusakirya abhatuumba abhaandi bhano bhatana obhusakirya.

17 Abhakaruka bhe ekanisa bhano bhakwiimeererera ekanisa bhuzomu, bhasuukwe no okukorerwa amazomu,\* kiindi bhano bhakwiiruusya okurwaaza no okweegya eng'ana ya Taatabhugya.

18 Niragaamba ego, kwo okubha ekaamirwe mu Makaamo Amahoreeru, “Eng’oombe hano ekuhuura engano, otayibhoha omunwa.”† Kweeki ekaamirwe, “Omuhokya wuyo woosi areenderwa ahaabhwe amariho gaaye.”‡

19 Otiikirirya amasemo iguru yo omukaruka we ekanisa, otana obhumenyeekererya bhwa abhaatu bhabhiri kasi bhataatu. §

20 Nawe abhakaruka bhe ekanisa bhano bhakugeenderera okukora amabhi, obharekye embere wa bhoosi, okubha abhaandi bhayo bhoobhohe.

### *Obhurekya ku Timoteo*

21 Nirakuswaagya embere wa Taatabhugya, ne embere ya Krisito Yeesu na bhamaraika abhasorwa kubha, ogwaatirire gayo, otatina ekiina kwa bhwaangu kasi okuseega orubhaara rumwe.

22 Otiikirirya kwa bhwaangu kumutuurira omuutu amabhoko akore emirimo gyo Omukuru, kwo okubha orimutuurira omuutu omubhi amabhoko, awe orabha wiisaangirye mubhubhi bhwaaye. Awe wiirihe, okubha osaage kubha omuheene.

---

\* **5:17 Bhasuukwe no okukorerwa amazomu** ku Kiyunaani ni *bhasuukwe maanga abhiri*. † **5:18** Rora Obhuhiiti bhwe Emigiro 25:4. ‡ **5:18** Rora Ruuka 10:7. § **5:19** Rora Obhuhiiti bhwe Emigiro 17:6, 19:15.

<sup>23</sup> Kweemera bhoono, awe otanywa amaanzi ageene, nawe obhe oranywa na amaanzi go omuzabibu\* masuuhu kwiiguru yo obhurweeri bhwaazo bhwe enda na amarweeri agaandi gano gakukunyaakya.

<sup>24</sup> Abhaatu abhaandi, ebhibhi bhyaabhu bhirarorekana kubhweero, naabhe bhakyaari kutinirwa ekiina. Nawe abhaatu abhaandi, ebhibhi bhyaabhu bhiibhisiri, bhirarorekana ibhaga riindi.

<sup>25</sup> Egoego, amahokya amazomu gararorekana kubhweero. Na garya giibhisiri, garabha kubhweero.

## 6

### *Obhuswaagyo kubhabhagati abhiikirirya*

<sup>1</sup> Abhagya bhoosi abhiikirirya, bhasuuke abhakuru bhaabhu, okubha eriina rya Taatabhugya na ameegyo geetu gatazeerwa.

<sup>2</sup> Abhagya bhano abhakuru bhaabhu ni bhiikirirya, bhatabhazeera kwo okubha ebho ni bhahiiri. Bhareenderwa kubhahokeerya bhuzomu no okukira, kiindi kwo okubha bharabha bharabhasakirya abhiikirirya abharikyaabhu, kweeki ni bhaseegwa bhaabhu. Gayo obheegye no okurekya.

### *Ameegyo go orurimi no obhuniibhi bhwe eheene*

<sup>3</sup> Bhariho abhaatu bhano bhakweegya ameegyo go orurimi. Bhareegya gano gatakwiikirirania na ameegyo go obhuheene

---

\* **5:23 Amaanzi go omuzabibu.** Rora amang'ana gano mu Bhugaruri bhwa Amang'ana Amakong'u.

bhwo Omukuru weetu Yeesu Krisito, kweeki gatakwiikirirania na ameegyo gano gakubhakaangata abhaatu okumutuniirira Taatabhugya.

<sup>4</sup> Bhayo bhiizwiiri obhwiizuungya, kweeki bhatamenyiri riyo ryoosi. Abhaatu bhayo bhariibhaamba haka zino zitana obhweera iguru ye ehing'ana hisuuhu. Mugayo gurarweeramu omugono, eriyyoge, amatuki, amiiseego mabhiihu,

<sup>5</sup> kweeki eziisiku zyoosi garasarya obhwiigwaani. Abhaatu bhayo bhasarikiri obhwoongo, bhatana obhuheene. Bhariiseega kubha okumutuniirira Taatabhugya niyo enzira yo okubhona obhuniibhi.

<sup>6</sup> Eheene, okumutuniirira Taatabhugya no okwiiswa ne ebhigiro bhino anabhyo, kuramukora omuutu abhone obhweera bhukong'u,

<sup>7</sup> kwo okubha mukyaaro muno, tutiiziri na kyokyoosi, naabhe tutakugya na kyokyoosi.

<sup>8</sup> Ambe, eraabhe tune ebhyaakurya na bhyo okwiibhoha, twiiswe nabhyo.

<sup>9</sup> Nawe bhano bhakweenda obhuniibhi, bharagweera mubhitiika, no okutiimbwa mubhitiimbo, na munaamba nzaru ye ekigeege. Eziinaamba ziyo zirabhasarya tee bhasike,

<sup>10</sup> kwo okubha okuseega bhukong'u eziimbirya nikwo obhweemero bhwo obhubhi bhwaaru. Abhaandi bhaseegiri obhuniibhi, bhang'eenereerwe, bhatigiri obhwiikirirya, bhoono bhariireetera obhururu bhwaaru no okunyaaka mukoro.

### *Obhurekya ku Timoteo*

<sup>11</sup> Nawe awe, omuutu wa Taatabhugya, ogaryaare gayo. Otuniirire obhuheene, obhusuuku bhwa Taatabhugya, obhwiikirirya, obhuseegi, obhwiikong'eererya no obhunyoohu.

<sup>12</sup> Orwaane eriihi izomu ryo obhwiikirirya, ogwaate obhuhoru bhwa kirakeego. Obhuhoru bhuyo, nibhwe okabhirikirirwa hano okiikirirya obhwiikirirya bhwaazo embere wa abhamenyeekererya bhaaru.

<sup>13</sup> Nirakukumiiirirya embere wa Taatabhugya wuno akubhiha obhuhoru ebhigiro bhyoosi, ne embere ya Krisito Yeesu wuno yarusirye obhumenyeekererya bhwe eheene embere wa Pontio Pirato,

<sup>14</sup> ogwaatirire obhuswaagyo bhuyo kwo okugiigwa no okutama okutitiikana, tee hano Omukuru weetu Yeesu Krisito araaze.

<sup>15</sup> Okuuzwa kwaaye kuraabhe eriihbhaga hano Taatabhugya yeendiri. Taatabhugya niwe araguungibhwa, ewe omweene niwe Omukaangati, niwe Omutemi wa abhatemi bhoosi, no Omukuru wa abhakuru bhoosi.

<sup>16</sup> Ewe omweene niwe atakukwa, yiikeeri mubhweero bhuno omuutu atakunagya kubhwiisukiirira. Kweeki atariho omuutu wuno amuruuzi, naabhe wuno akunagya kumurora. Obhusuuku no obhunagya bhuhwe bhwaaye, kirakeego. Gabhe ego.

<sup>17</sup> Obhabhuurire abhaniibhi bhatige okwiiguungya, naabhe okwiisiga obhuniibhi bhwaabhu bhwe ekyaaro kino, bhuno ni bhwi ibhaga iguhi. Nawe bhamwiisige Taatabhugya

wuno akutuha ebhigiro bhyoosi kwo obhusaambaaruku bhwaaye, okubha tubhihokeerye kwo obhuzomererwa.

<sup>18</sup> Kweeki obhabhuurire bhakore amazomu, niho bhabhe abhaniibhi mumahokya amazomu. Bhabhe bhararuusya ebhigiro no okwiisaangya hamwe na abhaandi kubhigiro bhyaabhu.

<sup>19</sup> Kwo okukora ego, bhariituurira ekibhuumbiko kyo obhurusa obhugumiru kuziisiku zino zikuuza, okubha bhasuung'aane obhuhoru bhwe eheene.

<sup>20</sup> Weyaa Timoteo, gwaatirira bhuzomu obhuheene bhuno oheerwe. Otige kwiisikirya mumang'ana gano gatari ge enyaangi na gatana obhugazuro bhwobhwoosi. Kweeki otiisikirya mubhuhakani bhwe ekigege, gano abhaatu abhaandi bhariisiga kubha amang'eeni.

<sup>21</sup> Abhaatu abhaandi bhano bhagwaatiriri gayo, bhatigiri obhwiikirirya bhwaabhu.

Orubhaango gubhe hamwe neemwe.

**Eriiragano Eriihya**  
**The New Testament in the Zanaki language of**  
**Tanzania: Eriiragano Eriihya**

copyright © Wycliffe Bible Translators, Inc.

Language: (Zanaki)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-13

---

PDF generated using Haiola and XeLaTeX on 11 Mar 2026 from source files dated 13 May 2025

59cdaa0a-a2d1-5bd9-b56f-be1ffc1ff2aa